



# Gimmie Griffie

**19 Januarie 2018**

**Webtuiste: [www.gimmies.co.za](http://www.gimmies.co.za)**

**Uitgawe: 1**

---

## GEAGTE OUERS

Baie welkom terug aan al ons personeel, leerders en ouers. 'n Besondere woord van welkom aan al die nuwe leerders wat deel word van die Gimmië-familie. Ons hoop en vertrou dat dit vir almal 'n wonderlike ervaring sal wees. Ons verwelkom ook vir mnre. Martin Marx (adjunkhoof) vroeër van Lichtenburg en Dawie Grobler (DH Wisk./FW) vanaf Schoonspruit en 'n oud-Gimmië. Ons vertrou dat hulle baie seën en werksvreugde by Gimmies sal ervaar.

Ons het verlede jaar 'n besonder goeie jaar beleef en hoop dat ons vanjaar weer so suksesvol kan wees. Alle ouers word uitgenooi om asseblief enige probleme met die hoof te kom bespreek, u is baie welkom.

Benewens die feit dat ons na afloop van die 2017 matriekuitslae weer met 'n 100% slaagsyfer kan spog, behaal ons ook die meeste onderskeidings (294) van alle skole in Noordwes, asook die derde hoogste matriekvrystellingsyfer (90,1%). Gemiddeld van die groep is 68,3%. Drie Gimmies tel onder die Top 20 in Noordwes, naamlik: Pieter Joubert (4de), Roubert Rousseau (8ste) en Anchen Badenhorst (11de).

8 Onderskeidings: Anchen Badenhorst, Wilru Campher en Pieter Joubert.

7 Onderskeidings: Laura Botes, Lourens Bronkhorst, Sabine Peters, Roubert Rousseau, Milandrè Stafford en Ané Wessels.

6 Onderskeidings: Lené de Kock, Judi Grobbelaar, Tamara Kirsten, Carina Munro, Ané Schoeman, Jaco Schoeman en George van der Westhuizen.

5 Onderskeidings: Arno Gustafson, Telanie Nieuwenhuizen, Marguerite Olivier, Jomyri Smuts, Marco van den Heever en Olga van Wyk.

4 Onderskeidings: Emce Badenhorst, Salome Brits, Rikus Coetzee, Bernard de Wet, Julianne du Plessis, Marilét Hamilton-Attwell, De Waal Jansen van Rensburg, Jade Jantjies, Johan Lombard, Chané Oosthuizen, André Pretorius, Marnus Putter, Lizanne Scholtz, Lize Smith, Anneke van Jaarsveld en Rizané van Rooyen.

Baie dankie vir almal wat die vakansie besig was by die merksentrum, hoofleier-simposium, swem, krieket, koshuis- en atletiekkamp.

### **Vakveranderings:**

Gr. 12: Geen verdere veranderings nie.  
Gr. 10-11: Voor einde Januarie.

Enige aansoeke vir spesiale konsessies (ekstra tyd) en ekstra vakke (gr. 10) moet voor einde Januarie afgehandel wees. Kontak me. Rosemary Fouché en mnr. Martin Marx.

**Voorkoms:** Ons stel 'n baie hoë premie op die netjiese voorkoms van ons leerders en daarom vra ons baie vriendelik dat almal streng by reëls, soos uiteengesit in die Gedragskode vir leerders, sal hou. Skoolklere is by *AK Sports and Leisure* (018 297 7860) en *Dapper Muis Skooldrag* (018 297 6543), hoek van Rivier- en Stilstraat, te koop. Ons sal u op hoogte hou van die nuwe sportdrag (wat by Glotron beskikbaar is), soos deur die organiseerders gereël en soos dit by die verskaffers beskikbaar raak.

Die skool het 'n klerebank waar goeie kwaliteit skoolklere gratis bekom kan word. Die klerebank is Maandae en Vrydae vanaf 13:30 tot 14:15 oop.

Ons versoek dat ouers asseblief sal toesien dat leerders se voorkoms reeds korrek sal wees. Alle graad 8's dra vanaf 17 tot 26 Januarie sportdrag skool toe. Sportdrag beteken 'n kort Gimmie-broekie, gekleurde spanhemp, kouse en tekkies. Na die "Gimmieword"-naweek word volledige skooldrag aangetrek.

**Oueraande:** U word by voorbaat na twee afspraak-oueraande uitgenooi (17 April en 24 Julie). Dinsdagaand 23 Januarie om 18:00 is daar 'n verpligte ouervergadering vir al die gr. 12's en

hulle ouers. Die gr. 9- tot 11-ouers word ook uitgenooi maar sal afsonderlik vergader. Na die betrokke vergaderings sal daar genoeg tyd gegee word sodat ouers verversings kan geniet en al ons personeel ontmoet. Die BL sal ook 'n spreekbeurt kry. Ondersteun asseblief hierdie aksie.

**Leerders wat siek word:** Indien 'n leerder in die oggend werklik siek voel, moet hy/sy asseblief nie skool toe kom nie. Afsprake by dokters, tandartse, ens. moet asseblief in die middag na skool gemaak word.

Indien 'n leerder gedurende skoolure siek word, sal die skool die betrokke ouers skakel om die leerder by die skool te kry. As die ouers nie die kind kan kom haal nie, sal die kind in die siekekamer gehou word. LEERDERS BEL NIE SELF HULLE OUERS NIE.

**Verlof aan leerders in skooltyd:** Verlof aan leerders om die skool in skooltyd te verlaat, word slegs in uiters dringende gevalle oorweeg. Dit is belangrik vir elke kind om elke periode in die klas te wees.

Die volgende prosedure moet gevolg word:

- Skriftelike versoek moet minstens twee dae vooraf by een van die adjunkhoofde ingedien word. (Leerders sal kennis kry by wie hulle toestemming moet vra.)
- Noodgevallen word met die hoof of adjunkhoofde hanteer.
- Leerders wat sodanige toestemming verkry het, moet in alle gevalle deur 'n ouer by die skool afgehaal en uitgeteken word nadat sy vakpersoneel van sy afwesigheid in kennis gestel is.
- Geen leerder mag ooit die terrein verlaat sonder om by die kantoor uit te teken nie.

- Ouers moet asseblief nie leerders kom afhaal sonder om vooraf die nodige reëlings te tref nie. Sterk asseblief ons hande in hierdie verband. Leerders sal slegs met skriftelike toestemming toegelaat word om saam met 'n ander persoon as sy ouers die skoolterrein te verlaat. Koshuisleerders gaan ook nie Vrydae vroeër nie.

Leerders wat wederegtelik afwesig is van skool, kan volgens die Gedragskode eksamentoelating verbeur.

Leerders sal slegs aan die einde van periodes uit klasse geroep word.

**Afsprake met die hoof:** Ouers is welkom om die hoof te enige tyd oor enige saak wat u as belangrik beskou, by die skool te spreek. Om frustrasie te beperk, moet u asseblief net eers skakel om 'n afspraak te maak.

**Reëls en Gedragskode:** Die reëls en Gedragskode is in die dagboekie aan nuwe leerders beskikbaar gestel.

**Belangrike datums:** Sien belangrike datums (onderhewig aan verandering) in die dagboekie, kommunikator en webblad.

**Kommunikasie:** Die skool gee weekliks 'n Gimmie-Griffie uit met die nuus vir die week asook die daaropvolgende week. U kind kan 'n gedrukte weergawe kry en u die elektroniese weergawe. Indien u dit nie elektronies ontvang nie, kan u me. Fina van Eck by [fveck@gimmies.co.za](mailto:fveck@gimmies.co.za) kontak.

U kan ook gerus ons internetwebruimte by [www.gimmies.co.za](http://www.gimmies.co.za) besoek waar addisionele inligting oor die skool beskikbaar is.

U kan ook die skool se kommunikator

aflaai deur die volgende skakel te gebruik:

<http://www.school-communicator.com/download.php>, kies Potchefstroom Gimnasium en laai dan af. U verkry dan onmiddellik toegang tot heelwat bronne en nuus nadat u u besonderhede en u kind se besonderhede geregistreer het.

**Afwesighede of laatkommery:** Ouers ontvang 'n sms vanaf die skool indien 'n leerder vir 'n betrokke dag of periode afwesig of laat is vir skool, selfs indien u vooraf reëlings getref het. Die stelsel stuur die SMS outomaties wanneer die kind afwesig gemerk word.

**Graadhoofde vir 2018:**

U is baie welkom om u kind se graadhoof te skakel indien u enige probleme t.o.v. u kind ervaar. Die graadhoofde vir 2018 is soos volg:

Graad 8: Mnr. D Grobler

Graad 9: Me. S Coertzen

Graad 10: Me. R Fouché

Graad 11: Me. L vd Westhuizen

Graad 12: Me. R van Wyk

**Skoolkwartale vir 2018:**

Die skoolkwartale vir 2018 is soos volg:

Kwartaal 1: 17 Jan. tot 28 Mrt.

Kwartaal 2: 10 Apr. tot 22 Jun.

Kwartaal 3: 17 Jul. tot 28 Sept.

Kwartaal 4: 9 Okt. tot 12 Des.

**Skooldagboek:** Elke leerder ontvang 'n 2018 skooldagboek. Leerders moet die skooldagboek daagliks gebruik en saam skool toe bring. Belangrike datums en kontakbesonderhede word in die dagboek gegee.

**Skoolfonds:** Beloop R14 000 (gr. 8 en 9) en R15 000 (gr. 10 tot 12) per jaar. Betaal asseblief hierdie rekening betyds. Indien u 'n probleem ervaar, kan u aansoek doen vir skoolgeldverligting. Dit word volgens inkomste op 'n glykskaal bereken. Die vorms is by me. Gerda Badenhorst

beskikbaar. Moet asseblief nie nalaat om aansoek te doen of 'n definitiewe reëling te tref as u 'n probleem ondervind nie. Ons versoek dat u betalings, sover moontlik, asseblief nie met kontant werk nie, maar internet-betaling of aftrekorders sal gebruik. Die bankbesonderhede is: ABSA Tjek-rekening: 670 640 469 (Takkode 632005). Ons verkies ook dat u die bewys eerder e-pos as faks. Indien u self 'n betaling kom maak, versoek ons baie mooi dat dit daaglik **voor 09:00** sal geskied. Dankie vir u ondersteuning in die verband.

Ons vra ook weer dat leerders persoonlike eiendom self ordentlik sal oppas en so min as moontlik duur items skool toe bring. Ons kan ongelukkig nie verantwoordelikheid aanvaar vir eiendom wat wegraak nie.

Die hoof en personeel is vir alle ouers toeganklik en beskikbaar. Die vinnigste metode om 'n probleem in die klas te hanteer, is om direk met die onderwyser of graadhoof te kommunikeer.

Ouers moet asseblief onthou dat *Pick a Pay* Van der Hoffpark goedgunstiglik vir die skool 'n persentasie van alle aankope gee. Gooi asseblief alle strokies wat u by die kasregister ontvang in die Gimmie-houer. Ons gebruik hierdie fondse baie goed.

Ons vestig weer alle afrigters, ouers en leerders daarop dat daar geen winter-sporttoefeninge of proewe gehou sal word die atletiek afgehandel is nie.

Baie voorspoed vir 2018.

Gimmie-groete,  
RA Oosthuizen

## **VOLGENDE WEEK SE PROGRAM**

### **Maandag 22 Januarie**

Atletiek: Interhuis – PUK Mc Arthur (07:30-16:30) Leerders kom direk na die stadion

### **Dinsdag 23 Januarie**

Ouervergadering: Gr. 9 tot 12  
Toneel: Oudisies (17:30)

### **Woensdag 24 Januarie**

Kooroefening begin

### **Donderdag 25 Januarie**

Kultuuruur (13:00-14:00)

### **Vrydag 26 Januarie**

Atletiek: Dr. Malan (Meyerton)

### **Saterdag 27 Januarie**

Krieket: o/15A Finsbury

## **ATLETIEK**

Vanjaar bied Gimmies buiten die Interhuis ook twee ander groot byeenkomste aan, naamlik die Gimmie-Prestige-byeenkoms (3 Februarie) en die Interhoër (17 Februarie). Ons sal dit opreg waardeer indien u kan help of 'n finansiële bydrae kan maak.

## **SKAAK**

Baie geluk aan die volgende spelers wat vanaf 3 tot 12 Januarie aan die SA-junior skaakkampioenskappe (vir termyn 2017) in Johannesburg deelgeneem het: Lené de Kock, Phillip du Preez, Niel Bekker, Anaïs Saayman en Wiehan Jonker. Gimmies is trots op julle.

## **SEILJAGVAART**

Gerhard van Niekerk (skipper) en sy bemanningslid, Dewan van Niekerk, het vanaf 9 tot 15 Desember 2017 aan die *South African Sailing Youth Nationals* deelgeneem. Na afloop van 15 wedvaarte is Gerhard aangewys as die wenner van die Hobie 16 klas en algehele wenner van die Ope Catamaran klas. As wenner het hy die gesogte Shaun Ferry Multihull wisseltrofee ontvang. Met die prestasie het Gerhard die eerste *SAS Youth Sailor* geword wat beide die Dart 18 en Hobie 16 Catamaran klasse by die *SAS Youth Nationals* kon wen. Hy het ook in 2017 die *SAS Northern Region* erekleure ontvang. Baie geluk, Gerhard.

## **ATKV-REDENAARS**

Die uitdunne vir leerders wat aan die ATKV-redenaarskompetisie wil deelneem, vind op Woensdag 31 Januarie om 18:00 in kamer 35 plaas.

Leerders mag oor enige onderwerp van hul keuse praat, maar die onderwerp moet beredeneerbaar wees. Die toespraak moet die gehoor van die leerder se standpunt oortuig. Die toespraak moet 'n duidelike standpunt bevat en die standpunt moet aan die hand van duidelike argumente en bronne beredeneer word.

Die toespraak moet 5 tot 7 minute lank wees.

Leerders sal ook 'n kort, onvoorbereide toespraak moet lewer.

Leerders wat belangstel om aan die uitdunne deel te neem, moet teen 26 Januarie hulle name by juf. Julie de Lange (k.35) gaan opgee.

Leerder wat aan die uitdunne deelneem, moet skooldrag aanhê. Die leerders se ouers is welkom om die uitdunne by te woon.

## **GIMMIE KUNSTE**

Ons nooi enige Gimmie wat in die uitvoerende kunste belangstel uit om deel te word van die Gimmie-kultuur. Binnekort word oudisies vir die verskeie ensembles gedoen, maar eers nooi ons belangstellende Gimmies wat graag aan Mnr. en Mej. Gimmie wil deelneem uit om te kom aanmeld by die kultuurkantoor. Enige seuns/meisies van graad 9 tot graad 12 is welkom om deel te neem. Hierdie funksie vind op 13 Februarie plaas en is altyd 'n gesellige en spontane geleentheid. Gimmies kry ook waarde vir hul geld as die personeel ook tydens dié aand optree! Leerders kan in die Gimmie-dagboekie, tye vir toneel-oudisies ens. sien. Alle Gimmies is altyd welkom in die Kultuursentrum!

## **MUSIEK**

By Gimmies kan Musiek vanaf graad 10 tot graad 12 as sewende of agtste skoolvak geneem word. Prakties (sang of 'n instrument) het die grootste gewigwaarde (45%). Die ander komponente van die vak is: gehooropleiding (8%), vormleer (3%), musiekbegrip (4%), musiekteorie (20%) en musiekgeskiedenis (20%).

Musiek is 'n universiteitsvrystellingsvak. Lesgelde vir praktiese onderrig (sang/instrument) is die enigste kostes verbonde aan die vak. Alle graad 10-leerders wat Musiek as agtste skoolvak wil neem, moet op Dinsdag 23 Januarie gedurende pouse by me. Francis de Wet in k.76 aanmeld.

## DRAMATIESE-KUNSTE

By Gimmies kan Dramatiese Kunste vanaf graad 10 tot graad 12 as agtste skoolvak geneem word. Die vak word aangebied deur me. Netta Schutte. Kontak haar by 083 797 3267 vir meer inligting rondom klasse en foie.

## EKSTERNE MUSIEK-EKSAMENS

Alle leerders wat in eksteme musiek-eksamens presteer, ontvang 'n toekenning by die prysuitdeling. Die eksteme eksameninstansies wat erken word, is: UNISA, ABRSM, TRINITY COLLEGE en ALMSA.

Leerders wat deur die loop van die vakansie hulle uitslae ontvang het, moet dit so gou as moontlik vir me. Francis de Wet in k.76 neem.

## SLUITKASSIES

Leerders se tasse is vol en daar is 'n behoefte aan sluitkassies. Die koste beloop R100 per jaar en is by juf. Nadia Malan beskikbaar. Sy sal slegs tydens voogperiodes en na skool tot 13:45 beskikbaar wees.

Leerders wat tans sluitkassies het en nog nie vir 2018 betaal het nie, moet asseblief voor einde Januarie betaal.

Alle ouers word vriendelik uitgenooi om by Gimmies se gebedsgroep betrokke te raak. Ons bid vir ons skool, ouers, leerders en personeel.

Dit is op Maandagoggende vanaf 07:00 tot 07:30 in die geleentheidskantoor.

## W I S K U N D E EKSTRA KLASSE!

*Nuwe Curriculum* Gr.8-12

*Loopafstand vanaf Gimmies!!*

*Persoonlike aandag*

*Goeie ervaring en kwalifikasies*

*Kontak: Andriette van den Berg*

*082 568 7273*

